

Novi album "Legendi": HALID NAM JE DOŠAO KO KEC NA DESETKU...

Autor D. ZEBA 2011-05-15 15:09:00



"Legende": U septembru koncert u sarajevskom BKC-u

JOŠ NAM NEDOSTAJU SEDMI PATULJAK I SNEŽANA

Spot za pjesmu "Tamburaši", koju grupa "Legende" izvodi s Halidom Bešlićem, najavit će izlazak novog albuma popularne srbijanske grupe. Ova pjesma za kratko vrijeme postala je hit u regionu i sigurno je da neće trajati kratak period, nego da će se slušati godinama.

- "Tamburaši" su, definitivno, kruna karijere. Ova pjesma sadržava sve ono što definira pitomu muziku "Legendi". Spot je rađen u etno selu "Stanišići", jer podsjeća na Bosnu u malom - kaže lider grupe Zoran Dašić.

Prvi duet

Članovi grupe sretni su što su imali priliku da sarađuju s našom muzičkom legendom i ovo je prvi duet koju su snimili u 25-godišnjoj karijeri.

- Halid je u nekoliko emisija isticao da mu se sviđa ono što radimo i da smo mi originalni proizvod iz Srbije. Nakon što je Daša (Zoran Dašić, op. a.) uradio pjesmu "Tamburaši" pustili smo je Halidu i on je bio oduševljen. Brzo smo se dogovorili da uradimo duet. Halid nam je, definitivno, došao kao kec na desetku - kaže pjevač Ivan Milinković.

Pjevač popularne grupe dodaje da njihove kompozicije nikada preko noći nisu postale slušane, nego je za to trebalo vremena.

- Mi nismo nikada bili hit varijanta. Zato sve što smo radili nije nestajalo preko noći. Jednostavno, da kažem malo šaljivo, mi ne pravimo hitove, mi pravimo evergrine. Bavimo se muzikom zato što je volimo, a ne da zaradimo - kaže Milinković.

"Legende" imaju veliki broj fanova u našoj zemlji, a sadašnju postavu uz pjevača Ivana Milinkovića, lidera Zorana Dašića, koji je i kompozitor i tekstopisac, čine Lazar Marin, Pero Krznanić, Želimir Vasić i Predrag Stojković.

- Već duže vremena brojimo šest članova. Još nam nedostaju sedmi patuljak i Snježana. Lijepo bi bilo da to bude Severina, ali bi tada bilo teško ekipu održati na okupu - kaže Dašić.

Koncert u Sarajevu

"Legende" bi najesen mogle održati promotivni koncert u Sarajevu, i to u prostoru Bosanskog kulturnog centra.

- Planirano je da to bude istinska koncertna poslastica. Najvjerovatnije da ćemo pjevati krajem septembra. Nakon klubova mislimo da je vrijeme da uradimo nešto ozbiljnije. Sarajevska publika je to zaslužila. Naše pravilo je da, kada odradimo koncert, uvijek se vraćamo. Nije bilo mjesta gdje smo svirali jedanput, a da nas nisu ponovo zvali - kaže Milinković.

Dodaje da se na repertoaru "Legendi" redovno nalaze sevdalinke i da će one naći svoje mjesto na koncertu u BKC-u.

- "Ah, meraka", "Sretan, sine, put", "Tebi, majko, misli lete", samo su neke od najdražih sevdalinki. Izvođenje tradicionalne bosanske muzike je veoma zahtjevno i samo dobri pjevači to znaju iznijeti na pravi način - kaže Dašić.

Hanka je kraljica

Milinković ističe da je na bh. estradi dosta kvalitetnih imena, a posebno ističe Hanku Paldum, koja je jedna od najboljih pjevačica u regionu.

- Ona je prava dama. Volimo kako pjeva. Njene pjesme su nešto posebno. Hanka je kraljica - kaže Ivan.

Više od 1.300 koncerata

Prvu koncertnu sezonu počeli su 19. januara 1995. godine nastupom u "Sava centru" i do sada su čak 43 puta svirali u istoj dvorani. Do sada su "Legende" održale više od 1.300 koncerata u Srbiji, Crnoj Gori, Makedoniji, Bosni i Hercegovini, Mađarskoj, Poljskoj, Kipru, Švedskoj, Sloveniji, Kanadi, Nemačkoj, Australiji, Americi, Rusiji...
